

欽定大清會典事例

欽定大清會典事例卷四百六十八

禮部

喪禮

宣宗成皇帝大喪儀二

咸豐元年正月十九日

文宗顯皇帝恭謁

西陵並謁

孝和睿皇后几筵前畢至

慕陵隆恩門外東朝房幄次更縞素親詣

慕陵饗殿几筵前補行初周年禮陳設祭物楮幣如數

內廷王及近前行走王大臣等於丹陛兩旁王以

下八分公以上於

隆恩門外月臺上。內大臣侍衛於月臺下。未入八分
公及滿漢文武大臣官員於東西兩配房前。按
翼排立。

文宗顯皇帝御縞素由

隆恩殿左門入詣

几筵前東立西嚮舉哀。衆咸舉哀。尚茶跪進茶。衆皆跪。
文宗顯皇帝舉茶奠於案。行一拜禮。衆隨行禮。尚茶徹
茶。次尚膳進膳。

文宗顯皇帝親上食畢。執事官進奠几。讀祝官恭奉祭

文於祝案左旁跪禮部堂官二員跪展祭文

文宗顯皇帝於奠几前跪衆皆跪哀暫止讀畢復於案
傳哭如初奉爵大臣跪進爵

文宗顯皇帝祭酒三爵每祭一拜興衆隨叩興

文宗顯皇帝復位立乃徹饌讀祝官奉祭文禮部堂官
前引內監恭請

冠服篚宮殿監侍二人前引由中門出

文宗顯皇帝豫出

隆恩殿左門

冠服至跪候過隨行

冠服至月臺下。內大臣十人前引。齊集之王公大臣官員等排跪。候過在後扈後隨行。於燎所兩旁稍遠排立。俟。

冠服祭文恭安畢

文宗顯皇帝詣奠酒處跪。衆皆跪。

文宗顯皇帝祭酒三爵。每祭行一拜禮。衆皆隨行禮畢。文宗顯皇帝稍後立。東嚮舉哀。衆咸舉哀。遞酒杯。大臣灌畢。哀止。

文宗顯皇帝於幄次。更青長袍褂冠。緞纓緯詣。

孝穆成皇后。

孝慎成皇后

孝全成皇后寶城前行恭謁禮畢仍由原進門出乘輿
還梁格莊行宮。○三月初四日遣官詣

慕陵饗殿几筵前行清明禮陳設祭物如數不設
冠服不讀文恭進楮錢寶花一座。○七月初十日奏

宣宗成皇帝聖誕謹擬是日

皇帝御龍褂藍袍挂朝珠詣

壽皇殿行三跪九拜禮隨從人員均補服挂朝珠

慕陵饗殿殿門外擬令直班之玉素服冠緞纓行禮奉
旨本年八月初十日恭值

皇考宣宗成皇帝聖誕。朕御龍袍龍褂。挂朝珠。虔詣壽皇殿行禮。隨從人員均著穿蟒袍補服。挂朝珠。是日。墓陵饗殿殿門外。著派端華敬謹行禮。○十五日遣官

行中元禮。陳羊酒饌筵。各祭物如數。照例齊集。儀與清明同。○十二月二十三日。以二十六日

墓陵隧道破土。遣官祇告。

孝穆成皇后

孝慎成皇后

孝全成皇后寶城前並

后上

山神。○二十九年。遣官行歲暮禮。一應禮儀。與道光三十年同。○二年正月十四日。行二周年致祭禮。各衙門文武官員。仍派三分之一之半。前往隨同行禮。儀與初周年同。○二月二十日。

文宗顯皇帝由京啟鑾二十三日。至梁格莊行宮。二十四日恭謁。

秦陵

奉東陵

昌陵畢先詣

孝和睿皇后几筵前行禮。次詣

宣宗成皇帝几筵前行禮次詣

孝穆成皇后

孝慎成皇后

孝全成皇后寶城前行禮禮畢乘輿還行宮○二十八

甲以三月初二日

梓宮奉安

地宮遣官告祭

天

地

太廟後殿

奉先殿

社稷。○三月初一日。行遷奠禮。

法駕鹵簿全設。恭理王大臣率執事人等。設

冠服篚於供牀。陳祭文案於

隆恩殿內稍西。供果卓於殿之正中。供羣卓於月臺兩

旁。反站涼棚設於

隆恩門內東旁。楮張設於橋前空處。讀祝官豫奉祭

文。禮部堂官二員前引。由

隆恩門中門入。設於案。

內廷王及近前行走。王大臣等於丹陛兩旁。王以

下八八分公以上於

隆恩門外月臺上。內大臣侍衛於月臺下。未入八分公及滿漢文武官員於東西配房前。按翼排立。

文宗顯皇帝御青長袍褂至。

慕陵東朝房幄次更縞素由。

隆恩殿左門入詣。

梓宮前東立西嚮舉哀。衆咸舉哀。尚茶跪進。茶衆皆跪。文宗顯皇帝舉茶奠於案。行一拜禮。衆隨行禮。尚茶做茶次尚膳進膳。

文宗顯皇帝親上食畢。執事官進奠。凡讀祝官恭奉祭。

文於祝案左旁跪禮部堂官二員左右跪恭展
祭文

文宗顯皇帝於奠几前跪衆皆跪哀暫止讀畢復於案
舉哀如初奉爵大臣跪進爵

文宗顯皇帝祭酒三爵每祭一拜興衆隨叩興
文宗顯皇帝復位立乃徹饌讀祝官奉祭文禮部堂官
前引內監恭奉

冠服篚宮殿監侍二員前引由中門出

文宗顯皇帝豫出

隆恩殿左門

冠服至。跪候過興。在後隨行。

冠服至月臺下。內大臣十員前引。齊集之王公大臣官員等。按翼跪候。過在豹尾槍後隨行。於燎所兩旁稍遠排立。俟。

冠服祭文恭安畢。

文宗顯皇帝詣奠酒處跪。衆皆跪。遞酒杯。大臣遞酒杯。文宗顯皇帝祭酒三爵。每祭行一拜禮。衆皆隨行禮畢。文宗顯皇帝稍後立。舉哀。衆咸舉哀。遞酒杯。大臣灌畢。哀止。

文宗顯皇帝詣更衣幄次。少俟。其楮錠暫停焚化。所有。

齊集各官仍於原齊集處排立執事王大臣帶領執事人進徹几案五供等項恭奉

梓宮升小舉畢禮部堂官奏請

文宗顯皇帝詣

梓宮前舉哀祭酒三爵每祭一拜興衆咸舉哀隨叩興

執事人等恭奉

梓宮由中階下循殿東行

文宗顯皇帝於左旁

親引上平臺至

蘆殿內

文宗顯皇帝詣東稍閒少憩

梓宮奉安於

蘆殿正中北嚮龍輦上。徹小舉解去。應釋等項。其龍套

俟奉入

地宮時啟去。北嚮設

几筵。禮部內務府堂官恭奉

冊

寶陳於左右案上

文宗顯皇帝詣

梓宮前南嚮祭酒三爵。每祭行一拜。禮衆隨叩興

文宗顯皇帝由左門出乘輿還宿次。執事官恭請
冠服儀仗至燎所與應焚之套罩等項一同焚化。○初

二日工部豫建

蘆殿於隧道丹陛上。設龍輜於

蘆殿內正中。丹陛前接造平臺。支搭戲橋。石牌樓門外
亦搭戲橋入

地宮隧道自丹陛至

寶牀前。俱合龍輜輪轂鋪墊木板。成造木軌。

寶牀前亦造木牀。高同龍輜。以備應用。屆時王公大臣
員等俱齊集。派出之王等恭奉

冊

寶。豫安於

地宮內左右石几上。

梓宮前供果卓。屆時。

文宗顯皇帝至。幄次更縞素入。

隆恩門東門由

隆恩殿東旁進詣

蘆殿

梓宮前舉哀。南嚮祭酒三爵。每祭行一拜禮。衆皆舉哀。

隨叩興

文宗顯皇帝躬引

梓宮龍輜循軌行。太監執鐙前導。派出之王大臣隨入。敬視永安於

寶牀上。執事以龍輜木軌出石門。敬閉大葬禮成。

文宗顯皇帝於祭臺前舉哀。祭酒三爵。每祭行一拜禮。衆皆舉哀。隨叩興哀止。

文宗顯皇帝詣幄次。更龍袍龍褂。俟

隆恩殿陳設俎豆牲牢畢。

文宗顯皇帝詣

隆恩殿行恭題

神主虞祭禮儀與道光元年同禮畢換藍袍青褂冠緞
纓緯恭奉

神牌黃輿還京一應禮儀並沿途朝夕奠祭均如例行
○是日以

山陵禮成遣官告祭

泰陵

泰東陵

昌陵

孝和睿皇后几筵前並

后土

山神。又

文宗顯皇帝撰成

慕陵碑文一篇。敬謹書寫。鑄於

隆恩門外碑石。以垂永久。○初七日。

神牌黃輿。由阜成門入。

大清門。隨從王公大臣官員俱朝服。隨行在京滿

漢文武大臣官員朝服於

大清門外恭俟

神牌黃輿至跪候。過隨行侍衛執提鑪一對前導。豫設

文宗顯皇帝更衣帳次於

太廟街門外陳鹵簿於

午門外出入不作樂太常寺堂官奏請

文宗顯皇帝御禮服乘輿出宮至

太廟街門外降輿入更衣幄次少候俟

神牌黃輿至

天安門時太常寺堂官奏請

文宗顯皇帝出幄次

文宗顯皇帝率諸王貝勒貝子公內大臣侍衛等朝服

恭迎贊引對引各官恭導

文宗顯皇帝至

太廟街門南門外

文宗顯皇帝跪王公大臣等俱跪恭候

神牌黃輿過

文宗顯皇帝興隨行王公大臣等皆興亦隨行

神牌黃輿入

太廟街門中門

文宗顯皇帝隨入陪祀王以下各官按翼分班隨入乃

行

升祔禮

詳見升祔儀

○四月十一日

文宗顯皇帝親詣

慕陵行釋服禮張黃幄於

寶城前月臺上幄內鋪白氈安

冠服篚於供牀設站卓於正中陳祭文案於階上之西
設幕於

隆恩殿東旁列羊酒於幕內陳燎牀於橋前空處設飯
卓近前果卓各一張於幄內供案中添供

孝穆成皇后

孝慎成皇后

孝全成皇后湯飯匙箸各一分羣卓二十三張列於階
下兩旁

內廷王及近前行走王大臣等於階下兩旁。王以下八分公以上。大學士內大臣侍衛等於陵寢門外。未入八分公以下及滿漢官員於

隆恩門外配房前。按翼序立。均青長袍褂冠。去纓緯守護。

陵寢之公夫人大臣官員命婦包衣管領妻等於

寶城前月臺下西牆角齊集。屆時

文宗顯皇帝出幄次進

隆恩門左門由

隆恩殿東旁行詣

寶城前黃幄內就拜位立舉哀衆咸舉哀尚茶奉茶恭
獻於案

文宗顯皇帝行一拜禮衆隨行禮尚茶徹茶次尚膳進
湯飯揭巾幕

文宗顯皇帝於几前跪哀暫止讀文畢傳哭如初
文宗顯皇帝奠酒三爵每奠行一叩禮衆隨行禮

文宗顯皇帝復位立乃徹饌讀祝官奉祭文禮部堂官
前引內監恭請

冠服篚宮殿監侍二人前引

文宗顯皇帝豫出黃幄外跪候

冠服篚過興隨行出

陵寢門中門前引內大臣十員恭導齊集之王公大臣
百官等按翼排跪候過隨行於燎所兩旁稍遠
排立俟

冠服祭文恭安畢

文宗顯皇帝詣奠酒位跪衆皆跪

文宗顯皇帝奠酒三爵每奠行一拜禮衆隨行禮

文宗顯皇帝稍後立舉哀衆咸舉哀遞酒大臣灌畢派
出之釋服大臣恭請釋服

文宗顯皇帝跪釋服戴纓冠哀止衆皆跪冠綴纓各哀

止

文宗顯皇帝乘輿還行宮。○三年正月十四日遣親王

恭詣

慕陵寶城前行三周年禮讀文致祭

欽定大清會典事例卷四百六十九

禮部

喪禮

文宗顯皇帝大喪儀一

文宗顯皇帝大喪儀。咸豐十一年七月十七日。

文宗顯皇帝崩於熱河

避暑山莊。

穆宗毅皇帝截髮辮成服。

孝貞顯皇后

慈禧皇太后率

妃

嬪公主及凡宮人翦髮摘耳環成服。○是日行大
斂禮。設丹旒於

二宮門之左陳

法駕鹵簿於

麗正門外。內務府官及內監等於

几筵殿中設黃幔。左右素帷。供牀南嚮。坐褥具。前設供
案。香盒。鑪。鐙具。內外齊集。

穆宗毅皇帝立殿檐東。西嚮哭。衆傳哭。內監啟門。恭理
喪儀。王大臣及執事官率尚茶尚膳由中門入
至殿前。

穆宗毅皇帝入殿左門詣

几筵前尚茶跪進茶衆皆跪。

穆宗毅皇帝舉茶奠於案行一拜禮衆隨行禮尚茶徹
茶次尚膳進膳揭巾幕。

穆宗毅皇帝親上食畢執事官進奠几於正中。

穆宗毅皇帝詣奠几前跪奉爵大臣跪進爵。

穆宗毅皇帝祭酒三爵每祭行一拜禮衆隨叩興乃徹
饌哀止。

穆宗毅皇帝還倚廬衆皆退。○每日朝晡日中三奠。

法駕鹵簿全設內外齊集欽天監報時各執事辦

位。

穆宗毅皇帝出倚廬詣

几筵前。東立西嚮哭。衆傳哭。廼啟門。

穆宗毅皇帝親舉茶上食如儀。○又奉

旨。著派睿親王仁壽。豫親王義道。恭親王奕訢。醇郡王奕讓。大學士周祖培。協辦大學士肅順。尚書全慶。陳孚恩。綿森。侍郎杜翰。總理喪儀。陳孚恩接奉此旨。即星速前來。行在豫親王義道。恭親王奕訢。周祖培。全慶。著在京辦理一切事宜。毋庸前赴行在。○又

諭。朕受

皇考大行皇帝鞠育顧復深恩。昊天罔極。

聖壽甫逾三旬。朕宮庭侍奉。正幸愛日方長。期頤可卜。上年夏間偶患痰嗽。旋即調攝就痊。秋閒

巡幸灤陽。

聖體康強猶昔。乃因各省寇氛未靖。

宵旰焦勞。至本年春閒因風寒感發舊疾。六月閒復患暑泄。以致元氣漸虧。本月十六日子刻。力疾

召見載垣端華景壽肅順穆蔭匡源杜翰焦祐瀛

特命承寫

硃諭立朕為皇太子。朕痛哭受

命哀迫戰兢。方冀

慈躬轉危為安。常承

恩誨。詎意親奉

顧命後。病勢增劇。遂至大漸。十七日寅刻。

龍馭上賓。搶地呼天。攀號莫及。朕之泣血椎心。尚忍言乎。惟念

付託至重。責在藐躬。尚賴內外文武大小臣工。共矢公忠。弼予郵治。至喪服之制。欽奉

遺詔。令照舊制二十七日而除。朕心實所不忍。仍當恪遵古制。敬行三年之喪。庶幾稍盡孺慕之誠。至於

郊

廟祭祀大典。自不應因大喪而稍略其禮節。應如何遣
官恭代及親詣行禮之處。著各該衙門查照向例。集
議以聞。其天下臣民應持服制。仍照定例行。○十八

日

諭

皇考大行皇帝龍馭上賓。朕應恭奉

梓宮回京。進宮後暫安觀德殿。所有一切典禮。著在京

恭理喪儀。王大臣先期敬謹豫備。○又

諭道光三十年

皇祖宣宗成皇帝大事。

皇考遵嘉慶二十五年成例停止各省將軍督撫提鎮藩臬及鹽關織造等來京叩謁。

梓宮今

皇考大行皇帝在山莊升遐恭奉

梓宮回京除熱河都統本在熱河直隸總督已諭前來熱河叩謁

梓宮外其餘直隸各大員俱不必前來各路統兵大臣各省將軍督撫副都統提鎮城守尉並盛京侍郎奉天府尹西北兩路將軍大臣及學政織造關差等均

不必奏請前來。致曠職守。○十九日。

命大學士九卿等敬擬

大行皇帝尊諡

廟號。○二十日。奏准治喪事宜。王以下文武各官閒散宗室覺羅等公主王福晉以下鄉君奉恩將軍妻恭人以上。民公夫人以下佐領三等侍衛妻以上。宗室之女等俱成服。在京之外藩公主福晉格格等額駙王台吉等及外國貢使均令成服。其二十七日内。在京者一律成服。二十七日後至者。男去冠纓。女去首飾三日。至專司

壇

廟

堂子

奉先殿

壽皇殿

坤寧宮祭

神殿

陵寢一應祭祀事務官員內監及出征官兵軍營辦事人等。均停止孝服。其有父母親喪子女出痘者亦暫免成服。仍百日不薙髮。第四日。王貝勒貝

子公等公主王福晉等在各私第齋室。部院官員在各公署。八旗及閒散官員在各衙門。喪服二十七日。於每日齊集時均齊集。恭理喪儀。王大臣守衛執事各官喪服百日。近派宗室二十七月內不嫁娶。遠派宗室及在京王公大臣文武官員期年內不嫁娶。二十七月內不作樂。不燕會。在京文武候補候選官員教習進士舉貢肄業監生吏典僧道官俱冠去纓。緯穿素服。在順天府齊集三日。早晚舉哀。在京軍民人等男去冠纓。女去首飾。素服二十七日。百日不嫁娶。

不作樂。二十七日不祭祀。自王公以至軍民人等。均百日不薙髮。百日內

上諭批本用藍筆。各部院奏章。俟十五日後具奏。二十七日內奏疏文移俱用藍印。在京寺廟各撞鐘三萬杵。○又

諭。恭理喪儀。王大臣會同禮部奏治喪事宜條款內載。縞素二十七日後

皇太后以下在宮中素服。現奉

母后皇太后

聖母皇太后懿旨。仍率妃嬪等服縞素百日。○又

諭。除恭理喪儀王大臣照例穿孝百日外。贊襄政務王大臣。並博親王奕誼。鍾郡王奕詒。字郡王奕諲。定郡王溥煦。郡王銜貝勒載治。溥莊。貝勒奕劻。御前大臣固倫額駙德木楚克扎布。軍機大臣文祥。內務府大臣寶璽。恩醇。明善。喀拉沁貝勒德木齊扎布。御前侍衛前鋒統領西拉布。護軍統領托雲德勒格爾。御前頭等侍衛西拉綱阿。護軍統領克興阿。亦著穿孝百日。其餘所有王大臣官員等。均著穿孝二十七日而除。將孝服焚化。○二十三日奏准。

梓宮回京。尚未定期。若在二十七日之外。王公百官等

遽行釋服於心實有不安請援照嘉慶二十五年奏准成案所有例應二十七日釋服之王公百官均於大祭後釋服其軍民人等素服摘纓二十七日之處亦應改至大祭後○又

諭據王大臣等奏三年之喪難以舉行請仍依舊制以日易月一摺覽奏愈增哀痛朕受

皇考大行皇帝鞠育深恩並親承

付託之重哀慕終身尚難仰報

慈恩於萬一雖持服三年豈足言孝且三年之喪達乎天子禮經所載敢不恪遵若以日易月於心實所不

忍除臣服制。仍各欽遵舊例。朕敬循古制。持服三年。以冀稍申孺慕。至

郊

社

宗廟祀典朝儀。仍可於持服中舉行。不至偏廢。其如何。舉行三年之喪。仍著各該衙門詳稽典禮。妥議具奏。
○又奏。紙堆處奠酒。奉

旨。派郡王銜貝勒載治。溥莊。輪流奠酒。○二十九日奏准。查向例。每日三次奠獻。王公百官齊集。係於二十七日停止。各衙門奏疏文移。用藍印。亦係

以二十七日為限。每日應行陳設。

法駕鹵簿。係於滿月禮後停止。今

梓宮回京。在二十七日之外。所有

几筵前每日三次奠獻。王公百官齊集。並各衙門奏疏。
丈移用藍印。及每日陳設。

法駕鹵簿。照嘉慶二十五年成案。一併改至大祭
禮後停止。○又

諭。古稱三年之喪。達乎天子。持服特其一端。昨據王大臣等請依舊制。以日易月。業經降旨明白宣諭。朕受皇考大行皇帝深恩罔極。今猝遭大故。哀痛方深。惟有

恪守禮經藉申永慕。非以持服三年。遂為盡孝也。今王大臣復援引舊章。合詞奏請。敬稽嘉慶二十五年仁宗睿皇帝大喪。

皇祖宣宗成皇帝係持服百日。道光三十年

皇祖大喪。

皇考大行皇帝亦持服百日。俱因臣工等籲請再三。未遂。

聖志。今朕孺慕。雖殷。亦何敢有逾。

成憲。不得已。勉從所請。縞素百日。仍素服二十七月。該大臣等不得再行瀆請。至三年內恭遇。

社 郊

宗廟祀典朝儀一切服色著王大臣等均查照成例敬
謹辦理。○八月初一日。行殿奠禮。用楮錠三萬。楮錢
三萬。色楮三萬張。饌筵二十一席。羊九。酒十。有
一尊。五鼓。工部設幕於

二宮門外之西。置奠几。陳燎牀於燎所。具楮幣。設
祭文案於

几筵殿內稍西。鑿儀衛官校陳

法駕鹵簿內監設

冠服篚於供牀。恭理喪儀。王大臣內務府大臣率執事官設果筵於

几筵前。列饌筵於階下兩旁。陳羊酒於幕內。讀祝官奉祭文。禮部堂官二員前引。由

二宮門中門入。設於案出。王公百官等各辨位集俟。屆時。禮部堂官奏請

穆宗毅皇帝詣

几筵前。東立西嚮。舉哀。衆咸舉哀。尚茶。跪進茶。衆皆跪。穆宗毅皇帝舉茶奠於案。行一拜禮。衆隨行禮。尚茶。徹茶。次尚膳進膳。揭巾罩。

穆宗毅皇帝親上食畢。讀祝官奉祭文於案左跪。禮部堂官二員左右跪展祭文。執事官進奠几。

穆宗毅皇帝於几前跪。衆皆跪。哀暫止。讀文畢。復舉哀。奉爵大臣跪進爵。

穆宗毅皇帝祭酒三爵。每祭一拜。興。衆隨叩興。

穆宗毅皇帝復位。乃徹饌。讀祝官奉祭文。禮部堂官前引。由中門上。至燎所東旁。避立。內監恭請。

冠服。篚宮殿監侍二人前引。由中門出。

穆宗毅皇帝豫出。

几筵殿左門。

冠服至跪候過興還倚盛

冠服至殿階前引大臣十員前引由中門出齊集之王
公大臣官員等按翼排立俱跪候過隨行至燎
所候

冠服祭文恭安於燎牀畢派出奠酒之員勒祭酒三爵
每祭行一叩禮衆皆隨行禮舉哀畢各退○初
二日奏准八月初十日

宣宗成皇帝聖誕八月十三日

高宗純皇帝聖誕八月二十七日

先師孔子誕辰此三日均禁止屠宰

几筵前應供素饌。○初七日恭頒

遺詔儀與嘉慶二十五年同。○又奏准

詔書到日。直省文武各官率紳士耆老摘纓素服出郊
跪迎至公署安設。行三跪九叩禮。跪聽宣讀畢。
立舉哀。復行三跪九叩禮。文武官均成服二十
七日。三日內率紳士人等朝夕舉哀。命婦等亦
穿素服二十七日。直省官員百日內不嫁娶。期
年內不作樂。直省軍民人等素服二十七日。一
月內不嫁娶。百日內不作樂。官員軍民人等。以
大事之日為始。均百日不雜髮。督撫提鎮等官

進香俱停止。領兵大臣率官員兵丁摘纓素服。跪迎入軍中安設。行三跪九叩禮。聽宣畢。舉哀。復行三跪九叩禮。皆摘冠纓三日。遣使頒發。

遺詔於朝鮮國國王率羣臣素服恭迎。止鼓樂。使臣就館。不受燕饗。頒發外藩蒙古諸部。遣理藩院官齋往。儀與朝鮮同。○又

諭著添派惇親王奕訢恭理喪儀。○初八日。諭。道光三十年。

皇考大行皇帝以

皇祖宣宗成皇帝。殊諭遺命。毋庸。

郊配

廟祔二條。

諭令王大臣會同九卿等敬謹妥議。嗣照禮親王全齡等所請。仍行

郊配祔

廟。並明降

諭旨。嗣後

郊祀配位。以

三祖

五宗為定。仰見我

皇考曲體

皇祖遺訓定以限制。

聖訓煌煌允宜敬謹遵守惟尊崇之典莫大於嚴

父配

天我

皇考功德昭著洽於寰區薄海臣民咸深欽仰雖

聖諭升配典禮不復舉行朕不忍遽從亦不敢遽定著

王大臣大學士會同九卿翰詹科道敬謹詳悉妥速

議奏○又會奏祭祀朝會禮儀服色一百日內恭遇

大祀俱遣官行禮百日外或

親詣行禮。或遣官恭代。均由太常寺題請。如孟春孟夏
孟秋時饗。仍俱遣官行禮。至孟冬時饗及歲暮
禘祭。是否遣官行禮。亦由太常寺題請。凡齋戒
日。常服不挂朝珠。

閱視祝版御龍褂。至

駕詣

天壇齋宮。是日早。

閱視祝版及省牲視牲。均御龍袍龍褂。冬用貂褂。乘禮
輜。不御輦。祭日。御禮服作樂。還宮時。導引鼓樂
設而不作。一百日外。元旦

堂子行禮。御禮服。百日外。遇

列聖聖誕。

親詣

奉先殿行禮。穿龍褂藍袍。挂朝珠。忌辰仍素服。一二十

七月內。凡遇中祀羣祀。俱遣官行禮。一宮內祀

神。百日後舉行。

親詣行禮。初次御龍袍龍褂。挂朝珠。二十七月內。御龍

褂藍袍。挂朝珠。一二十七月內。恭遇謁

陵。應遵照道光三十年奏准成案。請

皇帝在途次。御行衣。恭謁各

陵時御青長袍褂冠綴纓恭謁

孝德皇后几筵前時御縞素冠摘纓一百日外遇

萬壽聖節正日御常服其前三日後三日仍素服一明
年元旦請照咸豐元年之例用禮服

御太和殿不宣表不作樂二年元旦照咸豐二年元旦
之例不

御殿受賀御貂皮褂挂朝珠前後三日御貂皮褂不挂
朝珠忌辰仍素服於初五日補御貂皮褂一日
一。二。下七月內傳臚不

升殿一恭查道光元年

宣宗成皇帝御門聽政咸豐元年

大行皇帝御門聽政均在期年後應照成案俟期年後

請

皇帝御門聽政。百日外二十七日内封

寶開

寶。御龍褂藍袍挂朝珠。每月朔望用常服不挂朝珠。夏

季戴緯帽。

經筵

臨雍

耕藉典禮俱於二十七月後舉行。大祭後百日内尋

常

召見大臣官員及引

見官員俱於便殿辦理仍服縞素百日外二十七月內俱素服夏季戴雨纓冠。

皇太后以下主位等百日縞素二十七月內俱素服遇元旦日

萬壽聖節正日用吉服前後三日均用常服元旦後遇忌辰仍素服於初五日補穿常服一日。祭

先蠶壇二十七月內遣王福晉恭代用吉服不穿朝服由內務府辦理。王公百官等百日內恭遇

大祀承祭執事各官均朝服祭時作樂行禮齋戒日素服冠綴纓大祭禮以前百官不陪祀百日外二
十七月內恭遇

親詣行禮或遣官行禮齋戒日各官俱常服挂朝珠恭
遇

閱視祝版百官穿補褂至

駕詣

天壇齋宮是日早

閱視祝版及前期省牲視牲各官俱穿蟒袍補褂祭日

咸朝服一百日內遇中祀羣祀遣官致祭承祭

執事各官俱素服行禮。百官不陪祀。樂設而不作。百日外二十七月內齋戒日。各官俱常服祭日。朝服作樂。一百日外宮內初次祭。

神執事人員俱蟒袍補褂。二十七月內俱穿補褂。一。二十七月內元旦隨

駕詣

堂子王公大臣官員均穿朝服。一。王公文武大臣官員大祭禮後百日內穿青長袍褂冠綴纓。夏季戴雨纓帽。至

几筵前仍摘纓。其應穿百日孝之王大臣官員等仍服

編素。至百日外二十七月內。王公文武大臣官員均服青褂藍袍。夏季戴緯帽。遇朔望穿常服。不挂朝珠。至

几筵前及

山陵前。俱服青長袍褂。冠摘纓。一奉移

梓宮至

山陵。隨從人員。在途穿青長袍褂。冠摘纓。禮成後回京時。仍穿青長袍褂。冠綴纓。一百日外二十七月內。恭謁

山陵。隨從人員。在途次穿行衣。謁各

陵日。隨從人員穿青長袍褂。冠綴纓。

孝德皇后几筵前。隨從人員穿青長袍褂。冠摘纓。

萬壽聖節。正日。王公大臣官員俱穿蟒袍補褂。挂朝珠。其前三日後三日俱常服挂朝珠。

萬壽日。

几筵前上祭時。執事官仍摘冠纓。百日外遇元旦日。王公百官俱穿蟒袍補褂。挂朝珠。前三日後三日俱常服挂朝珠。忌辰仍素服。於初五日補穿常服挂朝珠一日。百日外二十七月內遇常朝坐班及封開印信日俱穿補褂挂朝珠。大

祭禮後百日內引

見官員俱穿青長袍褂。百日外穿青褂藍袍。遇朔望常服不挂朝珠。一百日內雨衣雨帽氈褂不論品級均用青色。百日外帽套各按品級。雨衣氈褂仍用青色。一外省在京各官赴

天安門謝

恩俱穿常服。如遇鄉試會試之年。停止筵燕。內外簾各員謝

恩穿常服。挂朝珠。一二十七月內各衙門封開印信告條。仍舊黏貼。其王公百官官銜封條。百日後黏

貼對聯門神。至二十七月後張挂。○十四日

諭。謹擇於九月二十三日辰時。恭奉

皇考大行皇帝梓宮回京。於二十二日辰時行啟奠禮。各該衙門敬謹豫備。○十七日行初周月禮。用楮錠五萬。楮錢五萬。連飯卓二十一張。羊九。酒九瓶。讀文齊集。陳設禮儀。與殷奠同。○十八日

諭。載垣等奏恭奉

梓宮回京。臣朕沖齡嗣位。合詞籲懇於恭送登輦後。先行啟奠回京。朕受

皇考大行皇帝顧復深恩。恭奉

靈駕回京。具有成例。何敢不遵。何忍不遵。惟該王大臣等情詞懇切。若不稍節勞動。轉無以仰慰

皇考在天之靈。九月二十三日。朕於麗正門外跪送梓宮登輦後。先赴喀拉河屯行宮。跪迎

靈駕。俟奉安

蘆殿。仍行晡奠禮。二十四日。行朝奠禮後。即啟蹕。於二十九日還宮。所有

梓宮沿途一切事宜。著恭理喪儀王大臣等敬謹將事。梓宮到京之日。朕先於德勝門外祇候。俟

靈駕到時。跪迎後。由閒道詣東華門外跪接。步送至乾

清宮。○又奏准。本年順天鄉試九月初六日至揭曉日。係在百日內。又在大祭禮之前。所有王公百官均未釋服。惟鄉試為掄才大典。未便仍服縞素。酌擬正副考官同考官及一切執事官員謝恩。並恭請恭接。

欽命題目之大臣等。屆時均穿常服。不挂朝珠。至入場後。均穿青長袍褂。冠綴纓。其控檢王大臣及一切執事官員人等。亦均穿青長袍褂。冠綴纓。計出場後。尚在大祭之前。自應仍易縞素。俟大祭後。一律釋服。至接辦場務大臣官員等。百日禮。

後均應穿青褂藍袍冠綴纓。○二十二日奏准

十月初一日。

頒賜初元正朔尚在

御極之前酌議改於十月初九日。

登極頒詔後是日一同

頒朔。○二十三日奏

梓宮回京奉安

乾清宮朝晡日中三奠事宜禮節奉

旨。福晉郡主及命婦等俱免其齊集。○又奏准十月初

九日

頒朔尚在大事百日之內。惟恭值

頒賜初元正朔。所有是日受朔之王公百官及執事各員服色應遵照嘉慶二十五年成案。仍穿朝服行禮。至明年十月初一日

頒朔係在期年之外。應照道光元年成案。均穿朝服行禮。○又奏准。十月初九日卯正初刻。

皇帝登極計時在朝奠禮以前。謹擬是日卯正以前請皇帝先詣

几筵前行祇告禮。所有王公百官一體穿素服冠緞纓。俟祇告禮畢。更朝服詣

太和殿前祇俟。其朝奠午奠晡奠齊集一切執事各員仍服縞素。停止舉哀一日。○二十七日大學士九卿等恭擬敬上

尊謚徽稱曰

協天翊運執中垂謨懋德振武聖孝淵恭端仁寬敏顯皇帝。

廟號曰

文宗。天下萬世稱為

文宗顯皇帝。奏入奉

諭。大學士九卿會同議上

皇考大行皇帝

尊諡曰

顯皇帝。

廟號曰

文宗。上配

列祖同為百世不祧之廟。詳慎公允。深協朕懷。此天下萬世之公論。非朕一人哀慕尊崇之私願。亦非臣下尊親頌美之私情也。謹據所奏恭上

尊諡

廟號。所有應行典禮。該部敬稽成例以聞。